



100 onns
Lia Rumantscha

Cuira, ils 16 da november 2020

Communicaziun a las medias

Il Servetsch da mediaziun da la SRG SSR Svizra tudestga dat suatientscha a la reclamaziun da la Lia Rumantscha

Dossier nr. 6684 «Tagesgespräch» da Radio SRF dals 8 da fanadur 2020

Il Servetsch da mediaziun da la SSR Svizra tudestga ha dà suatientscha a la reclamaziun da la Lia Rumantscha davart l'emissiun «Tagesgespräch» dals 8 da fanadur 2020 sin Radio SRF. I cuntrafetschia al princip d'objectivitat da betg menziunar il rumantsch en in'emissiun areguard la plurilinguitad en Svizra. La Lia Rumantscha è cuntenta cun la posiziun dal servetsch da mediaziun.

Sut il titel «Die Schweiz und ihre Mehrsprachigkeit: Schön wär's!» ha tematisà l'emissiun «Tagesgespräch» dals 8 da fanadur 2020 sin Radio SRF la convivenza per part mancanta da las linguas en Svizra. Durant l'emissiun da var 17 minutas n'è il rumantsch betg vegnì menziunà. Il Servetsch da mediaziun da la SSR Svizra tudestga ha publitgà quests dis il rapport final (dossier nr. 6684) en connex cun la reclamaziun da la Lia Rumantscha.

Violà il princip d'objectivitat

Per il Servetsch da mediaziun «na datti betg pli bler d'aggiuntar» a la reclamaziun da la Lia Rumantscha. «Da sclauder il rumantsch e da betg menziunar il Grischun talian è stà dapli che mo in sbagl.» Ultra da quai è il servetsch da mediaziun d'accord cun la Lia Rumantscha che «l'emissiun contestada haja violà il princip d'objectivitat». Suenter discurs constructivs cun la direziun generala da la SSR e cun la redacziun da Radio SRF desista la Lia Rumantscha da sa drizzar cun sia reclamaziun er a l'Instanza independenta da recurs da radio e televisiun (AIRR).

Betg admess da divider la Svizra en trais regiuns linguisticas

En sia reclamaziun ha la Lia Rumantscha crititgà che l'emissiun haja dividi la Svizra en mo trais regiuns linguisticas. Tenor la Lia Rumantscha cuntrafetschia l'emissiun a las pretensiuns da la Lescha federala davart radio e televisiun (LRTV) che stipulescha en l'artitgel 4 ch'ils fatgs vegnian preschentads a moda adequata. La Lia Rumantscha ha plinavant crititgà ch'il Tessin saja vegnì duvrà sco sinonim per l'entir territori linguistic talian da la Svizra.

Dossier nr. 6684, register dals cas dal Servetsch da mediaziun da la SSR Svizra tudestga

<https://www.srgd.ch/de/uber-uns/ombudsstelle/fallregister-neu/>